

# REGLEMENT 20

## REGLEMENT VIR KERKLIKE GOEDERE

### 1. ALGEMENE SINODALE GOEDERE

#### 1.1 ADMINISTRASIE VAN ALGEMENE SINODALE GOEDERE<sup>1</sup>

1.1.1 Die Nederduitse Gereformeerde Kerk (NG Kerk) in algemene sinodale verband is 'n regspersoon en die Algemene Sinode, of ander gevolmagtigde(s) deur die Algemene Sinode aangewys, is sy orgaan. Die NG Kerk is dus eienaar van alle roerende en onroerende goedere wat deur die Algemene Sinode beheer en verkry word.

1.1.2 Vaste eiendom word in die naam van die *Nederduitse Gereformeerde Kerk Algemene Sinode* geregistreer.

1.1.3 Algemene sinodale kerklike goedere word geadmistreer deur die Algemene Steunspan Fondse en Bates ingevolge besluite van die Algemene Sinode<sup>2</sup> en die vereistes vir 'n Openbare Weldaadsorganisasie soos bepaal deur Artikel 30 en Artikel 10 (1)(cN) van die Wet en die vereistes van die Belastingvrystellingseenheid van die SAID.

1.1.4 Die Algemene Steunspan Fondse en Bates is bevoeg om in opdrag van die Algemene Sinode enige regshandeling te verrig en om tussentydse beleggings te maak wat verband hou met die beskikking, verkryging, ontvangs van testamentêre bemakings, vervreemding, beswaring of versekering van die betrokke bates, onderhewig daaraan:

1.1.4.1 dat die inkomste en eiendom van die Algemene Sinode, met inbegrip van eiendom of inkomste wat deur enige gevolmagtigde van die Algemene Sinode bestuur word, nie aan enige persoon uitgekeer mag word nie, maar uitsluitlik aangewend mag word vir die beoefening van die aktiwiteite (openbare weldade) van die Algemene Sinode en die bevordering van die oogmerke waarvoor dit ingestel is as 'n Openbare Weldaadsorganisasie; en

1.1.4.2 dat niks wat hierin bepaal is, die betaling te goeder trou belet van redelike besoldiging (synde vergoeding wat nie oormatig is, inaggenome wat algemeen as redelik geag word in die openbare weldaadsorganisasie-sektor en met betrekking tot die diens gelewer nie) aan enige werknemer of beampete van die Algemene Sinode vir dienste wat sodanige persoon werklik aan die Algemene Sinode gelewer het nie); en met insluiting van:

1.1.4.3 die ontvang van oordrag van alle eiendomme, goedere of fondse van die ontbinde Raad van Kerke en die gefedereerde rade;

1.1.4.4 die verkryging van eiendomme, roerend en/of onroerend, deur skenking, erflating, aankoop, huur of op enige ander wyse; en

1.1.4.3 die behoud van 'n belegging in die vorm van 'n besigheidsonderneming of handelsaktiwiteit (of enige bate in so 'n besigheidsonderneming of handelsaktiwiteit) wat dit as 'n skenking, bemaking of erflating verkry, in die vorm waarin dit verkry is mits dit voldoen aan die Wet en die vereistes van die Belastingvrystellingseenheid van die SAID.

1.1.5 In geval van die uitrede van al die sinodes in terme van Artikel 36 van die *Kerkorde* of die ontbinding van die Algemene Sinode, word alle eiendomme, goedere en fondse tussen die samestellende sinodes na verhouding van die getal belydende lidmate binne die gebied van elke sinode ten tye van die ontbinding verdeel, met dien verstande dat 'n sinode slegs in die verdeling van die Algemene Sinode se bates mag deel indien dit ingevolge die Wet goedgekeur is as 'n Openbare Weldaadsorganisasie.

1.1.6 Die Algemene Steunspan Fondse en Bates administreer die algemene sinodale kerklike goedere, met dien verstande dat die Steunspan:

1.1.6.1 deurlopend sal verseker dat daar voldoen word aan die kerkordelike bepalinge, reglemente en besluite van die Algemene Sinode én die vereistes vir 'n Openbare Weldaadsorganisasie soos bepaal deur die Wet en die vereistes van die Belastingvrystellingseenheid van die SAID; en

<sup>1</sup> **Kerklike goedere** [versamelnaam vir besittings] sluit in alle roerende en onroerende besittings soos eiendomme en fondse, skenkings en bemakings asook handelware of koopware, materiaal en stof.

<sup>2</sup> Die Algemene Sinode het in 2013 bevestig dat met die ontbinding van die Algemene Sinodale Sendingkommissie (ASSK) en die Algemene Kommissie vir Diens van Barmhartigheid (AKDB) volgens besluit van die Algemene Sinode in 2004, die Algemene Diensgroep Diensgetuïenis (ADD) die gemagtigde orgaan van die Algemene Sinode as regspersoon geword het. Die Algemene Sinode het in 2013 bevestig dat met die ontbinding van die Algemene Jeugkommissie volgens besluit van die Algemene Sinode in 2004, die Algemene Diensgroep Gemeente-ontwikkeling (ADGO) die gemagtigde orgaan van die Algemene Sinode as regspersoon geword het. Die Algemene Sinode het in 2013 bevestig dat met die ontbinding van die Algemene Diensgroep Gemeente-ontwikkeling (ADGO) en die Algemene Diensgroep Diensgetuïenis (ADD), die Algemene Sinodale Moderamen die gemagtigde orgaan van die Algemene Sinode as regspersoon geword het.

1.1.6.2 die volgende beheer- en bestuursdokumente vir goedkeuring voorlê:

1.1.6.2.1 aan die Algemene Sinode/Moderamen wanneer nodig: die reglemente, aktes van oprigting en/of konstitusies van al die betrokke strukture en afsonderlike kerklike regsenteite wat aan die Steunspan finansiële verslag doen, asook enige voorgestelde wysigings daaraan; en

1.1.6.2.2 aan die Bedryfspan jaarliks: die volgende finansiële bestuursinligting ten opsigte van alle strukture en ander regsenteite soos verwys na in 1.6.2.1:

1.1.6.3.1 goedgekeurde geouditeerde finansiële state van die vorige finansiële jaar;

1.1.6.3.2 die goedgekeurde begroting vir die huidige finansiële jaar; en

1.1.6.3.3 enige ander toepaslike finansiële bestuursinligting soos deur die Bedryfspan versoek; en

1.1.6.4 volledige registers moet byhou van alle vaste bates en eiendomme, alle skenkings en bemakings asook beleggings van die Algemene Sinode en word ook as sodanig in die Staat van Finansiële Posisie van die Algemene Sinode getoon.

## **1.2 SKENKINGS EN BEMAKINGS**

1.2.1 Alle skenkings en bemakings aan die Algemene Sinode word deur die Algemene Steunspan Fondse en Bates hanteer en bestuur in oorleg met die Algemene Steunspan Regte. Wanneer skenkings en bemakings volgens wetlike eise anders hanteer moet word, moet die korrekte voorskrifte nagekom word met verantwoording aan die Algemene Sinode. Die Algemene Sinode sal nie 'n skenking wat herroeplik op aandrang van die skenker is, vir ander redes as die wesenlike versuim om aan die aangewese oogmerke en voorwaardes van bedoelde skenking te voldoen (met inbegrip van enige wanvoorstelling met betrekking tot die belastingaftrekbaarheid daarvan ingevolge Artikel 18A van die Wet) aanvaar nie: met dien verstande dat 'n skenker nie enige voorwaarde mag oplê wat bedoelde skenker of enige verbonde persoon met betrekking tot bedoelde skenker in staat kan stel om enige direkte of indirekte voordeel uit die aanwending van die skenking te verkry nie.

1.2.2 Indien 'n skenking/bemaking vir 'n spesifieke doel gemaak word, moet dit ten behoeve van daardie gespesifiseerde doel aangewend word.

1.2.3 Indien 'n skenking/bemaking vir 'n goedgekeurde projek gedoen word, mag die betrokke projekspan dit daarvoor aanwend.

1.2.4 Indien 'n projekspan 'n skenking/bemaking wil aanwend vir 'n doel of projek waarvoor daar nog nie goedkeuring ontvang is nie, moet die advies en goedkeuring van die Algemene Steunspan Fondse en Bates eers verkry word.

1.2.5 In geval die Algemene Steunspan Fondse en Bates nie goedkeuring gee nie, mag die projekspan hom na die Moderamen wend.

1.2.6 Om eiendomme, roerend en/of onroerend, te verkoop, te verruil, te verhuur, te skenk of op enige ander manier te vervreem, te verbind, in pand, as sekuriteit te gee, of op enige ander wyse te beswaar met dien verstande dat:

1.2.6.1 skenkings slegs gemaak mag word ter bevordering van die doelstellings van die Algemene Sinode volgens Artikel 43 óf aan teologiese studente óf aan bedienaars van die Woord, werknemers en amptenare in diens van kerkvergaderinge van die NG Kerk, asook aan godsdienstige, liefdadigheids- en/of opvoedkundige inrigtings wat ingevolge die bepalings van die Wet en die vereistes van die Belastingvrystellingseenheid van die SAID van belasting vrygestel is;

1.2.6.2 slegs sekuriteit gegee mag word vir die verpligtinge van die Algemene Sinode.

## **1.3 BELEGGING VAN FONDSE**

1.3.1 Om gelde onder sy beheer te belê en om sodanige beleggings te gelde te maak, op te vra, te kanselleer, te sedgeer, te verander of andersins daarmee te handel met dien verstande dat:

1.3.1.1 Die Algemene Steunspan Fondse en Bates die verantwoordelikheid het om die Algemene Sinode se beleggingsportefeulje deurlopend te beskerm deur te verseker dat die nodige maatreëls in plek is;

1.3.1.2 Beleggings word slegs gedoen in terme van die Algemene Sinode se goedgekeurde beleggingsbeleid;

1.3.1.3 Die Algemene Sinode se *strategiese bateverdeling* jaarliks saamgestel word na inagneming van die Algemene Sinode se begrote bedryfsuitgawes en dat die allokasie in ooreenstemming moet wees met Regulasie 28-bepelings wat die Pensioenfondswet voorstel;

1.3.1.4 Die Beleggingskommissie van die Steunspan die Beleggingsbeleid en -strategie van die Algemene Sinode deurlopend moet nakom, met dien verstande dat die Algemene Steunspan Fondse en Bates nieteenstaande bostaande beperkings, 'n skenking of bemaking belê word in ooreenstemming met die voorgeskrewe vereistes soos deur die skenker/bemaker bepaal.

## **1.4 REGSGEDINGE OF DISPUTE OOR ALGEMENE SINODALE KERKLIKE GOEDERE**

1.4.1 In alle regsgedinge of dispute oor algemene sinodale kerklike goedere tree die Algemene Steunspan Fondse en Bates sonder meer bepaalde lasgewing sowel eisend as verwerend ten behoeve van die Algemene Sinode op ná raadpleging van die Algemene Steunspan Regte.

1.4.2 Ten einde hierdie handeling te verrig, word alle amptelike dokumente onderteken deur twee lede van die Algemene Steunspan Fondse en Bates wat daartoe deur die Algemene Sinode of die Moderamen gemagtig is.

1.4.3 Die Algemene Sinode het geen aanspraak op die eiendomme, goedere en fondse wat aan die samestellende sinodes, ringe of kerkrade behoort en onder afsonderlike reglemente besit en beheer word nie.

1.4.4 Waar enige vaste eiendom aan die Algemene Sinode geskenk of nagelaat word ten behoeve van 'n werksaamheid of inrigting binne die gebied van 'n sinode, word dit met wedersydse instemming vir beheer en administrasie opgedra aan die betrokke sinode om vir die werksaamhede of inrigting aangewend te word.

1.4.5 Eiendomme wat voor die totstandkoming van die Algemene Sinode van die NG Kerk in gefedereerde verband gevestig was (soos byvoorbeeld die eiendomme onder die toesig en beheer van die Algemene Sondagskoolkommissie) het in 1962 met kerkvereniging die eiendomme van die NG Kerk in die algemene sinodale verband geword. Transportaktes van sodanige eiendomme wat op naam van die verskillende sinodes geregistreer staan, kan met die oog op besparing van koste, onveranderd bly. Enige handeling in verband met sodanige eiendomme geskied egter in terme van die bepalings van hierdie *Reglement*. Hierdie eiendomme kan verbind of vervreem word volgens die bepalings van die *Kerkorde* van die betrokke sinode in wie se naam dit geregistreer is, slegs nadat die Algemene Steunspan Fondse en Bates in oorleg met die Algemene Steunspan Regte en die Algemene Sinode/Moderamen daarvoor besluit het.

## **2. SINODALE GOEDERE**

2.1 Die Nederduitse Gereformeerde Kerk (NG Kerk) in sinodale verband is 'n regspersoon en die Sinode, of ander gevolmagtigde(s) deur die Sinode aangewys, is sy orgaan.

2.2 Die NG Kerk is dus eienaar van alle roerende en onroerende goedere wat deur die Sinode beheer en verkry word en vaste eiendom word in die naam van die *Nederduitse Gereformeerde Kerk Sinode* ..... geregistreer.

2.3 Sinodale kerklike goedere word geadministreer ingevolge besluite van die Sinode en die vereistes vir 'n Openbare Weldaadsorganisasie soos bepaal deur Artikel 30 en Artikel 10 (1)(cN) van die Wet en die vereistes van die Belastingvrystellingseenheid van die SAID.

2.4 Die Sinode of sy gevolmagtigde is bevoeg om enige regshandeling te verrig en om tussentydse beleggings te maak wat verband hou met die beskikking, verkryging, ontvangs van testamentêre bemakings, vervreemding, beswaring of versekering van die betrokke bates, onderhewig daaraan:

2.4.1 dat die inkomste en eiendom van die Sinode, met inbegrip van eiendom of inkomste wat deur enige gevolmagtigde van die Sinode bestuur word, nie aan enige persoon uitgekeer mag word nie, maar uitsluitlik aangewend mag word vir die beoefening van die aktiwiteite (openbare weldade) van die Sinode en die bevordering van die oogmerke waarvoor dit ingestel is as 'n Openbare Weldaadorganisasie; en

2.4.2 dat niks wat hierin bepaal is, die betaling te goeder trou belet van redelike besoldiging (synde vergoeding wat nie oormatig is, inaggenome wat algemeen as redelik geag word in die openbare weldaadorganisasie-sektor en met betrekking tot die diens gelewer nie) aan enige werknemer of beamppte van die Sinode vir dienste wat sodanige persoon werklik aan die Sinode gelewer het nie); en met insluiting van:

2.4.3 die verkryging van eiendomme, roerend en/of onroerend, deur skenking, erflating, aankoop, huur of op enige ander wyse; en

2.4.4 die behoud van 'n belegging in die vorm van 'n besigheidsonderneming of handelsaktiwiteit (of enige bate in so 'n besigheidsonderneming of handelsaktiwiteit) wat dit as 'n skenking, bemaking of erflating verkry, in die vorm waarin dit verkry is mits dit voldoen aan die Wet en die vereistes van die Belastingvrystellingseenheid van die SAID.

2.5 Volledige registers moet byhou van alle vaste bates en eiendomme, alle skenkings en bemakings asook beleggings van die Sinode en word ook as sodanig in die Staat van Finansiële Posisie van die Sinode getoon.

### **3. RINGSGOEDERE**

3.1 Die Nederduitse Gereformeerde Kerk (NG Kerk) in ringsverband is 'n regs persoon en die Ring, of ander gevolmagtigde(s) deur die Ring aangewys, is sy orgaan.

3.2 Die Ring is dus eienaar van alle roerende en onroerende goedere wat deur die Ring beheer en verkry word en vaste eiendom word in die naam van die *Nederduitse Gereformeerde Ring* ..... geregistreer.

3.3 Die Ring se kerklike goedere word geadminestreer ingevolge besluite van die Ring en die vereistes vir 'n Openbare Weldaadsorganisasie soos bepaal deur Artikel 30 en Artikel 10 (1)(cN) van die Wet en die vereistes van die Belastingvrystellingseenheid van die SAID.

3.4 Die Ring of sy gevolmagtigde is bevoeg om enige regshandeling te verrig en om tussentydse beleggings te maak wat verband hou met die beskikking, verkryging, ontvangs van testamentêre bemakings, vervreemding, beswaring of versekering van die betrokke bates, onderhewig daaraan:

3.4.1 dat die inkomste en eiendom van die Ring, met inbegrip van eiendom of inkomste wat deur enige gevolmagtigde van die Ring bestuur word, nie aan enige persoon uitgekeer mag word nie, maar uitsluitlik aangewend mag word vir die beoefening van die aktiwiteite (openbare weldade) van die Ring en die bevordering van die oogmerke waarvoor dit ingestel is as 'n Openbare Weldaadorganisasie; en

3.4.2 dat niks wat hierin bepaal is, die betaling te goeder trou belet van redelike besoldiging (synde vergoeding wat nie oormatig is, inaggenome wat algemeen as redelik geag word in die openbare weldaadorganisasie-sektor en met betrekking tot die diens gelewer nie) aan enige werknemer of beampte van die Ring vir dienste wat sodanige persoon werklik aan die Ring gelewer het nie); en met insluiting van:

3.4.3 die verkryging van eiendomme, roerend en/of onroerend, deur skenking, erflating, aankoop, huur of op enige ander wyse; en

3.4.4 die behoud van 'n belegging in die vorm van 'n besigheidsonderneming of handelsaktiwiteit (of enige bate in so 'n besigheidsonderneming of handelsaktiwiteit) wat dit as 'n skenking, bemaking of erflating verkry, in die vorm waarin dit verkry is mits dit voldoen aan die Wet en die vereistes van die Belastingvrystellingseenheid van die SAID.

3.5 Volledige registers moet byhou van alle vaste bates en eiendomme, alle skenkings en bemakings asook beleggings van die Ring en word ook as sodanig in die Staat van Finansiële Posisie van die Sinode getoon.

### **4. GEMEENTELIKE GOEDERE**

4.1 Die Nederduitse Gereformeerde Kerk (NG Kerk) in gemeenteverband is 'n regs persoon en die Kerkraad, of ander gevolmagtigde(s) deur die Kerkraad aangewys, is sy orgaan.

4.2 Die Gemeente is dus eienaar van alle roerende en onroerende goedere wat deur die Kerkraad beheer en verkry word en vaste eiendom word in die naam van die *Nederduitse Gereformeerde Gemeente* ..... geregistreer.

4.3 Gemeentelike kerklike goedere word geadminestreer ingevolge besluite van die Kerkraad en die vereistes vir 'n Openbare Weldaadsorganisasie soos bepaal deur Artikel 30 en Artikel 10 (1)(cN) van die Wet en die vereistes van die Belastingvrystellingseenheid van die SAID.

4.4 Die Kerkraad of sy gevolmagtigde is bevoeg om enige regshandeling te verrig en om tussentydse beleggings te maak wat verband hou met die beskikking, verkryging, ontvangs van testamentêre bemakings, vervreemding, beswaring of versekering van die betrokke bates, onderhewig daaraan:

4.4.1 dat die inkomste en eiendom van die Gemeente, met inbegrip van eiendom of inkomste wat deur enige gevolmagtigde van die Kerkraad bestuur word, nie aan enige persoon uitgekeer mag word nie, maar uitsluitlik aangewend mag word vir die beoefening van die aktiwiteite (openbare weldade) van die Gemeente en die bevordering van die oogmerke waarvoor dit ingestel is as 'n Openbare Weldaadorganisasie; en

4.4.2 dat niks wat hierin bepaal is, die betaling te goeder trou belet van redelike besoldiging (synde vergoeding wat nie oormatig is, inaggenome wat algemeen as redelik geag word in die openbare weldaadorganisasie-sektor en met betrekking tot die diens gelewer nie) aan enige werknemer of beampte van die Gemeente vir dienste wat sodanige persoon werklik aan die Gemeente gelewer het nie); en met insluiting van:

4.4.3 die verkryging van eiendomme, roerend en/of onroerend, deur skenking, erflating, aankoop, huur of op enige ander wyse; en

4.4.4 die behoud van 'n belegging in die vorm van 'n besigheidsonderneming of handelsaktiwiteit (of enige bate in so 'n besigheidsonderneming of handelsaktiwiteit) wat dit as 'n skenking, bemaking of

erflating verkry, in die vorm waarin dit verkry is mits dit voldoen aan die Wet en die vereistes van die Belastingvrystellingseenheid van die SAID.

4.5 Volledige registers moet byhou van alle vaste bates en eiendomme, alle skenkings en bemakings asook beleggings van die Gemeente en word ook as sodanig in die Staat van Finansiële Posisie van die Sinode getoon.

## **5. KERKLIKE REGSENTITEITE**

5.1 Alhoewel die Algemene Sinode<sup>3</sup> nie regs aanspreeklikheid aanvaar vir die werksaamhede en verpligtinge van afsonderlike kerklike regsentiteite (bv maatskappye, organisasie sonder winsoogmerk en openbare weldaadsorganisasies) waarvan die lede van die Moderamen die ledevergadering vorm óf waarvan die Algemene Sinode of die Moderamen die lede van die ledevergadering aanwys of laat aanwys nie, is dit vir die strategiese belyning en operasionele beplanning van die Algemene Sinode se werksaamhede noodsaaklik dat die finansiële inligting genoem in 2.6.3 ten opsigte van die afsonderlike kerklike regsentiteite (buiten die Algemene Sinode, sinodes, ringe en gemeentes) vir die Algemene Sinode en sy gevolmagtigde(s) beskikbaar moet wees en dat daar deurlopend voldoen moet word aan toepaslike wetgewing.

5.2 Die Algemene Sinode, of die Moderamen wanneer die Algemene Sinode nie in sitting is nie, beslis in gevalle waar die Algemene Steunspan Fondse en Bates en 'n ander gevolmagtigde van die Algemene Sinode, én/óf waar die Algemene Steunspan Fondse en Bates en 'n bepaalde regsentiteit waarvan die lede van die Moderamen die ledevergadering vorm of die lede van die ledevergadering aanwys of laat aanwys, én/óf waar die afsonderlike regsentiteite onderling nie eenstemmigheid kan bereik nie.

5.3 Al die kerklike regsentiteite moet voldoen al die wetlike vereistes soos op die betrokke kerklike regsentiteit van toepassing.

5.4 Die reglemente, aktes van oprigting en/of konstitusies van kerklike regsentiteite, asook enige wysigings daaraan, word aan die Algemene Sinode/Moderamen via die Algemene Steunspan Fondse en Bates voorgelê en goedgekeur waar van toepassing.

5.5 Aangesien die Algemene Sinode die rekeningkundige raamwerk "*IFRS for SMEs excluding business combinations*" vir sy eksterne oudit volg, hoef die finansiële state van ander kerklike regsentiteite nie gekonsolideer te word nie, mits daar vir 'n spesifieke regsentiteit anders besluit word deur die Algemene Sinode.

## **6. DIE KERK<sup>4</sup> AS 'N OPENBARE WELDAADSORGANISASIE**

6.1 Die voorwaardes en vereistes vir 'n organisasie om as 'n Openbare Weldaadsorganisasie (OWO) goedgekeur te word, is vervat in Artikel 30 van die Wet, terwyl die reëls wat die voorkeur behandeling van 'n OWO ten opsigte van belastingvrystelling vervat is in Artikel 10(1)(cN) van die Wet. Artikel 10(1)(cN) maak voorsiening vir die vrystelling van normale belasting van sekere ontvangstes en toevallings van goedgekeurde OWO's. Sekere ontvangstes en toevallings van 'n besigheidsonderneming of handelsaktiwiteit sal nogtans belasbaar wees.

6.2 Goedgekeurde OWO's moet regdeur hulle bestaan voldoen aan die Wet en verwante wetgewing. Indien 'n fidusiêre persoon skuldig bevind word aan 'n misdryf, kan hy/sy na skuldigbevinding 'n boete opgelê word of tronkstraf kry vir 'n periode wat nie twee jaar oorskry nie.

6.3 Die volgende vereistes is belangrik om na te kom:

6.3.1 Die enigste oogmerk van die OWO is om een of meer openbare weldaadsaktiwiteit, soos omskryf in Artikel 30(1) van die Wet, op 'n nie-winsgewende grondslag en met 'n altruïstiese of filantropiese bedoeling, te onderneem.

6.3.2 Geen aktiwiteit sal regstreeks of onregstreeks die ekonomiese eiebelang van enige fiduciarius of werknemer van die organisasie bevorder, anders as by wyse van redelike besoldiging.

6.3.3 Die OWO is verplig om ten minste drie (3) persone, wat nie verbonde persone met betrekking tot mekaar is nie, te hê om die fidusiêre verantwoordelikheid van bedoelde organisasie te aanvaar en geen enkele persoon regstreeks of onregstreeks die besluitnemingsbevoegdheid met betrekking tot daardie organisasie beheer nie: Met dien verstande dat die bepalinge van hierdie paragraaf nie van toepassing is nie met betrekking tot enige trust wat ingevolge die testament van 'n persoon wat voor of op 31 Desember 2003 te sterwe gekom het, opgerig is:

Adresverandering moet binne 60 dae aan die Kommissaris van die SAID verskaf word;

Enige verandering aan die konstitusie moet onmiddellik by die Kommissaris aangemeld word;

<sup>3</sup> Waar nodig ook van toepassing op sinodes, ringe en gemeentes.

<sup>4</sup> Die Algemene Sinode, sinodes, ringe en gemeentes en ander kerklike regsentiteite

Alle finansiële state moet vir vier jaar bewaar word;

Veranderinge tov die drie fidusiële persone moet onmiddellik by die Kommissaris aangemeld word.

6.3.4 Die OWO word verbied om direk of indirek enige van sy fondse aan enige persoon uit te keer (behalwe in die loop van die beoefening van enige openbare weldaadsaktiwiteit) en dit word vereis om sy fondse alleenlik vir die oogmerk waarvoor dit ingestel is, aan te wend.

6.3.5 Die fondse van die OWO sal slegs aangewend word vir die oogmerk waarvoor dit ingestel is.

6.3.6 By ontbinding van die OWO sal die oorblywende bates oorbetaal word aan –

6.3.6.1 enige soortgelyke OWO, wat goedkeuring ingevolge Artikel 30 van die Wet geniet;

6.3.6.2 enige instelling, raad of liggaam wat ingevolge die bepaling van Artikel 10(1)(cA)(i) van die betaling van belasting vrygestel is, wat as enigste of vernaamste oogmerk die beoefening van enige openbare weldaadsaktiwiteit het; of

6.3.6.3 enige staatsdepartement of administrasie in die nasionale of provinsiale of plaaslike regeringsfeer van die Republiek, soos in Artikel 10(1)(a) of (b) van die Wet bedoel.

6.3.7 Die OWO is verbied om 'n skenking wat herroeplik op aandrang van die skenker is, vir ander redes as die wesentlike versuim om aan die aangewese oogmerke en voorwaardes van bedoelde skenking te voldoen, met inbegrip van enige wanvoorstelling met betrekking tot die belastingaftrekbaarheid daarvan ingevolge Artikel 18A, te aanvaar nie: Met dien verstande dat 'n skenker (behalwe 'n skenker wat 'n goedgekeurde OWO is of 'n instelling, raad of liggaam is wat ingevolge Artikel 10(1)(cA)(i) van belasting vrygestel is en wat as sy enigste of vernaamste oogmerk het die beoefening van enige openbare weldaadsaktiwiteit) nie enige voorwaarde mag oplê wat bedoelde skenker of enige verbonde persoon met betrekking tot bedoelde skenker in staat kan stel om enige direkte of indirekte voordeel uit die aanwending van die skenking te verkry nie.

6.3.8 'n Afskrif van enige wysigings aan die konstitusie, trustakte, Akte van Oprigting en Statute, of enige ander geskrewe stuk waarkragtens die OWO ingestel is, sal aan die Kommissaris voorgelê word.

6.3.9 Geen besoldiging sal aan enige werknemer, amptenaar, lid of ander persoon wat oormatig is, inaggenome wat algemeen as redelik geag word in die sektor en met betrekking tot die diens gelewer, betaal word en sal nie enige persoon ekonomies bevoordeel op enige wyse wat nie in ooreenstemming met sy oogmerke is nie.

6.3.10 Die OWO nie bewustelik 'n party is of was nie by, of nie bewustelik toelaat, of nie bewustelik toegelaat het nie, dat dit gebruik word as deel van 'n transaksie, handeling of skema waarvan die enigste of hoofdoel die vermindering, uitstel of vermyding is van die aanspreeklikheid vir enige belasting, reg of heffing wat, by ontstentenis van bedoelde transaksie, handeling of skema, deur 'n persoon ingevolge hierdie Wet of enige ander Wet wat deur die Kommissaris geadministreer word, betaalbaar sou gewees het of geword het.

6.3.11 Geen hulpbronne regstreeks of onregstreeks gebruik is om enige politieke party te ondersteun, bevorder of opponer nie.

6.3.12 Die OWO sal die vereiste Inkomstebelastingopgawe IT12EI (tesame met aanvullende dokumentasie indien aangevra) indien. Alle inkomste en uitgawes moet verklaar word.

6.3.13 In die geval van 'n OWO wat fondse of bates voorsien aan enige vereniging van persone soos bedoel in paragraaf (b)(iii) van die omskrywing van 'n "openbare weldaadsaktiwiteit" in Artikel 30 van die Wet, redelike stappe sal neem ten einde te verseker dat die fondse vir die doel waarvoor dit voorsien is, aangewend word.

6.3.14 'n Goedgekeurde OWO ingevolge Artikel 18A(1)(b)(i) van die Wet, moet ten minste 75% van die fondse wat ontvang is deur die organisasie by wyse van skenkings wat ingevolge hierdie Artikel as 'n aftrekking kwalifiseer, uitkeer (of die verpligting aangaan om aldus uit te keer) binne 'n tydperk van twaalf maande vanaf die einde van die finansiële jaar waartydens bedoelde skenkings verkry is.

6.3.15 In die geval van OWO's bepaal Artikel 63A van die Wet:

'n OWO ingevolge Artikel 30(3) van die Wet deur die Kommissaris goedgekeur moet enige kapitaalwinst of kapitaalverlies bepaal ten opsigte van 'n beskikking oor 'n bate verontagsaam, waar –

6.3.15.1 die gebruik van daardie bate vanaf waardasiedatum deur daardie OWO nie gerig was op enige besigheidsonderneming of handelsaktiwiteit nie; of

6.3.15.2 wesenlik die geheel van die gebruik van daardie bate op en na waardasiedatum deur daardie OWO gerig is op –

6.3.15.2.1 'n doelstelling anders as die beoefening van 'n besigheidsonderneming of handelsaktiwiteit; of

6.3.15.2.2 die beoefening van 'n besigheidsonderneming of handelsaktiwiteit in Artikel 10(1)(cN)(ii)(aa), (bb) of (cc) van die Wet beoog.

6.3.16 *Vrystellings van die normale belasting*: Artikel 10 van die Wet bepaal die volgende:<sup>5</sup>

---

<sup>5</sup> Kyk ook INTERPRETATION NOTE: NO. 24 (Issue 2)

*Van die normale belasting word vrygestel – die ontvangste en toevallings van enige OWO ingevolge Artikel 30(3) van die Wet deur die Kommissaris goedgekeur, in die mate wat die ontvangste en toevallings verkry is, anders as uit enige besigheidsonderneming of handelsaktiwiteit; of uit enige besigheidsonderneming of handelsaktiwiteit*

- (i) *indien die onderneming of aktiwiteit-integraal en direk verwant is tot die enigste of vernaamste oogmerk van daardie OWO soos in paragraaf (b) van die omskrywing van "openbare weldaadsorganisasie" in Artikel 30 van die Wet beoog; beoefen of uitgevoer word op 'n grondslag waarvan wesenlik die geheel gerig is op die verhalings van koste; en wat nie onregverdige mededinging met betrekking tot belasbare entiteite tot gevolg het nie;*
- (ii) *indien die onderneming of aktiwiteit van 'n toevallige aard is en wesenlik onderneem word met vrywillige bystand sonder vergoeding;*
- (iii) *indien die onderneming of aktiwiteit deur die Minister by kennisgewing in die Staatskoerant goedgekeur is, met inagneming van – die omvang en welwillendheidsaard van die onderneming of aktiwiteit; die direkte verband en verwantskap van die onderneming of aktiwiteit met die enigste of vernaamste oogmerk van die OWO; die winsgewendheid van die onderneming of aktiwiteit; en die vlak van ekonomiese verwringing wat deur die belastingvrye status van die OWO wat die onderneming of aktiwiteit bedryf veroorsaak mag word; of*
- (iv) *behalwe 'n onderneming of aktiwiteit ten opsigte waarvan item (i), (ii) of (iii) van toepassing is en nie meer is nie as die grootste van 5 persent van die totale ontvangste en toevallings van daardie OWO gedurende die betrokke jaar van aanslag; of R200 000.*

## **7. DEFINISIES**

### **7.1 FIDUSIËRE PERSOON EN PLIGTE**

7.1.1 Die vereiste vir 'n fidusiêre persoon is een wat 'n vertrouensposisie beklee en verantwoordelik optree met besluitnemingsbevoegdheid met betrekking tot die besigheid van 'n organisasie.

7.1.2 *Fidusiêre pligte* val onder vier opskrifte:

7.1.2.1 die fidusiêre persone moet konflik van belange vermy;

7.1.2.2 die fidusiêre persone mag nie die grense van hulle bevoegdhede oorskry nie;

7.1.2.3 die fidusiêre persone moet deurgaans 'n onbevange diskresie handhaaf; en

7.1.2.4 die fidusiêre persone moet hulle bevoegdhede uitoefen vir die doel waarvoor dit toegeken is.

7.1.3 'n Openbare Weldaadsorganisasie (OWO) moet ten minste drie onverbonde persone hê wat die fidusiêre verantwoordelikheid vir die organisasie aanvaar.

### **7.2 KOMMISSARIS**

Die kommissaris van die Suid-Afrikaanse Inkomstediens (SAID) – “kommissaris”.

### **7.3 OPENBARE WELDAADSAKTIWITEIT**

'n Openbare Weldaadsaktiwiteit is

7.3.1 enige aktiwiteit in Deel I van die Negende Bylae van die Wet gelys as:

7.3.1.1 *Godsdiens en Geloof*

7.3.1.1.1 *Die bevordering of beoefening van godsdiens wat dade van aanbidding, getuienis, onderrig en gemeenskapsdiens insluit, gebaseer op 'n geloof in 'n godheid.*

7.3.1.1.2 *Die bevordering en/of beoefening van 'n geloof; en*

7.3.2 enige ander aktiwiteit van tyd tot tyd deur die Minister by kennisgewing in die Staatskoerant bepaal as van 'n welwillendheidsaard te wees, met inagneming van die behoeftes, belange en welvaart van die algemene publiek.

### **7.4 OPENBARE WELDAADSORGANISASIE**

7.4.1 Is enige organisasie wat –

7.4.1.1 'n nie-winsgewende maatskappy is, soos omskryf in a 1 van die Maatskappywet 71 van 2008 of 'n trust of 'n vereniging van persone is wat in die Republiek ingelyf, opgerig of gestig is; of

7.4.1.2 'n tak binne die Republiek is van enige maatskappy, vereniging of trust opgerig, ingelyf of ingestel in 'n land behalwe die Republiek en wat van belasting op inkomste in daardie ander land vrygestel is;

7.4.2 Is enige organisasie waarvan die enigste of hoofmerk die beoefening van een of meer openbare weldaadsaktiwiteite is, waar –

7.4.2.1 al daardie aktiwiteite beoefen word op 'n nie-winsgewende grondslag en met 'n altruïstiese of filantropiese bedoeling;

7.4.2.3 geen van daardie aktiwiteite bedoel is om regstreeks of onregstreeks die ekonomiese eie belang van enige fiduciarius of werknemer van die organisasie te bevorder nie, anders as by wyse van redelike besoldiging wat aan daardie fiduciarius of werknemer betaalbaar is; en

7.4.3 Is enige organisasie waar –

7.4.3.1 elke sodanige aktiwiteit deur daardie organisasie beoefen word vir die voordeel van, of algemeen toeganklik is vir, die algemene publiek, ingesluit enige sektor daarvan (behalwe klein en eksklusiewe groepe); en

7.4.3.2 enige aktiwiteit deur die Minister ingevolge paragraaf (b) van die omskrywing van "*openbare weldaadsaktiwiteit*" in subartikel 30 (1) van die Wet bepaal of enige voorwaardes deur die Minister ingevolge subartikel 30 (3)(a) van die Wet voorgeskryf moet binne 'n tydperk van 12 maande na die datum van publikasie deur die Minister in die Staatskoerant van daardie aktiwiteit of daardie voorwaardes, in Parlement ter tafel gelê word vir insluiting in die Wet.

## **7.5 WET**

*Wet verwys na die Inkomstebelastingwet 58 van 1962 (soos gewysig).*